

## **Iwarakha i Napaolo wa Attu o Ufilipi Malhove o uholhelha**

Napaolo yaalhempe iwarakha wa attu anrumelhenhe Kuristo o Ufilipi iyaakha yo 61 baada yo uyaria wa Kuristo, ikatema Napaolo vaari aya anattukiye (nlhako wo 1:13), veekinaka vaari aya Urumi. Iwarakha iyo yaalhepiye wa nlhoko wa attu anrumelhenhe Kuristo yaakhalha iwani yo Ufilipi. Ninwooria tho waachuwelha attu o Ufilipi mwi ikitabu yo Mitheko cha akarumiya. Iwani yo Ufilipi yaari iwani yulhupalhe mwi ilhapo yo Umakedoniya. Ni uwo chiicho wahaawo nlhoko wo upachera uchokholhiya Umakedoniya. Napaolo ni Nasila yaari attu yaachokholhinhe nlhoko wa attu anrumelhenhe Kuristo vamoka, tho ni uttukiya uhiyu mmoka vaari aya wowo (Mitk nlhako wo 16).

Napaolo vaalhepa aya ilha iwarakha ilha, yaari ni nrima mwinchi wo waarama ulhepa ilha iwarakha ilha. Tho, wo nennno nipesha nno, ahaashukuru attu anrumelhenhe Kuristo wo izawadi chaakuminhe aya veewilhe aya wiira Napaolo yaari muuttukiyan, (nlhako wo 4:10-19). Tho, ahaahimiachera yayo manyaattu ayo mwaha wo makhalhelho yaakhalha aya muuttukiyan. Ahaathanlha Natimotheo ni Naepafroditu ni waachuwelhiha wa attu anrumelhenhe Kuristo (nlhako wo 2:19-30) wiira

apocheriye ni wiiwelhelhiya rata, vanohalha aya uvara ntheko wo waaholhelha attu.

### **Chiri nhina.**

Napaolo anochokholha iwarakha aya wo waashikuria attu anrumelhenhe Kuristo o Ufilipi (nlhako wo 1:1-2).

Tho, anoohimiacha mwaha waapantte un-aacha mitheko chaya (nlhako wo 1:3-2:30).

Anowaavaha ikano chinothananiya aya attu ukhalha makhalhelho a attu anrumelhenhe Kuristo (nlhako wo 3:1-4:9).

Napaolo anomalhiha wo waashukuru attu anrumelhenhe Kuristo o Ufilipi wo izawadi chaarweeheliye aya ni waavaha isalamu (nlhako wo 4:10-23).

<sup>1</sup> Mii Paolo ni Timotheo namitheko a Yesu Kuristo, ninoolhepa iwarakha iwe uwaninyu mwaatti attu a Nlhuku nlhutanne ni Kuristo Yesu nri Ufilipi vamoka ni aholhelhi ni attu anaakaviha ushunga nlhoko wa attu a Nlhuku. <sup>2</sup> Kinoulhapelhelhani nnema ni mpuha ukhuma wa Nlhuku Athumwanihu ni Athithi Yesu Kuristo.

### *Napaolo anowaalhapelhelha attu a Nlhuku o Ufilipi*

<sup>3</sup> Kinonshukuru Nlhuku aka kila ikatema vanowupuwelhaakani mwaatti, <sup>4</sup> ni kila vanoulhapelhelhakani mwaatti onkhaye, kinolhepelha wo uteelhiya munrimani, <sup>5</sup> wo nlhatu no ukhalha nlhoko mmoka ni mii uvara ntheko wo uhimimacha Malhove Orera ukhuma nihuku no upachera nne mpaka lhelho nna va. <sup>6</sup> Paahi, mii kihochuwelha we ikekhiaye wiira Nlhuku

chokhonlhe ulha nthecko woombone uwaninyu ulha phi nowa aamalhihera nihuku no uhokolhia Kuristo Yesu nne.

<sup>7</sup> Phi nrera aya irusho chaka chuwuupuwelheni chiicho, kwaani mwaatti nri munrimani mwaka. Ukhahawaya mwaatti onkhaye va nhokikaviha munnemani mukivanhe awe Nlhuku wo wiinanelha ni uhimiechesha Malhove Orera, vattukiye aka va ama vaari aka kihinatukiya. <sup>8</sup> Ukhahawaya we ikekhiaye Nlhuku phi nohimiechesha ittu inoolhumacha aka, wo uttuna unokhuma munrimani mwa Yesu Kuristo ulhe, kiholhakelha chinene uwoonani mwaatti.

<sup>9</sup> Cho phi nonlhapelha aka Nlhuku, uttuna winyu uthepeke wunchereria chinene vamoka ni uchuwelha ikekhanne wo irusho wo iphiro chonkhaye, <sup>10</sup> wiira nchuwelhe ittu yo ulhoka. Nkhalhe ni nrima ntakatifu wo uhikhala ni nlhatu urwoothe wo unanara mpaka nihuku no uhokolhia Kuristo nno. <sup>11</sup> Vavawo ukumi inyu unocharihiya meetelho e ikehia mmiholho wa Nlhuku anokhuma wa Yesu Kuristo mwanene wiira Nlhuku athimichiya ni utotopelhiya.

### *Ukhahha ukumi wo unkavihera Kuristo*

<sup>12</sup> Ashilhoko aka, kinothanana nchuwelhe wiira mwaha wonkhaye ukipantte mii, uhokavisha uwanelhiha Malhove Orera. <sup>13</sup> Paahi etu wo yoyo nlhatu uyo, manyaasikari onkhaye anolhitelhelha inupa ya amwene vamoka ni attu akina onkhaye o va, ahochuwelha wiira kittukiye wo nlhatu no urumiya ni Kuristo. <sup>14</sup> Ukhahawaya uttukiya waka uhaapanga attu enchi anaarumelhelha Athithi athepe ukhalha

ni machiri o waakhulhuvelha Athithi chinene ni uhimiacha nlhove na Nhuku wo uhoova ittu.

<sup>15</sup> We ikekhiaye attu akina anohimiacha Nlhove na Kuristo wo nlhatu wo ihache ni uhilhoka nrima, nansho attu akina anonhimiacha wo nlhatu woombone. <sup>16</sup> Yayo manyaattu ayo anonhimiacha wo uttuna ukhalhawaya ahochuwelha wiira Nhuku hokivaha ulha ntheke wo winkelha Malhove Orera ulha. <sup>17</sup> Nansho attu akina alhe anohimiacha Nhove na Kuristo wo nlhatu wo wishipa kuhii wo uteelhiya munrimani, yaanyiheraka wiira anokuncherera uhuva urina aka vattukiye aka va.

<sup>18</sup> Nansho yayo uwannyaka mii khave ittu. Wo iphiro choothe, ikhalhe wo nrima woombone ama wo ikekhiaye, Malhove Orera a Kuristo anooohimiachiya. Ni wo yoyo nlhatu uyo, mii phi nothepa aka uteelhiya nrima, <sup>19</sup> ukhalhawaya kihochuwelha wiira wo ulhapelha winyu ni ukavihereriya ni Iphumu ya Yesu Kuristo kinoohiyereriya. <sup>20</sup> Mathananelho aka molhupalhe ni ukhulhuvelha waka uri woona wiira wo iphiro iriyoothe akinoolhiya muru munthekoni waka. Nansho kilhipeke nrima, kila ikatema, kichokholhaka vano, wiira mwiiruttuni waka mwonkhaye kinari nkumi ama kinakhwilhe Kuristo athimichiye. <sup>21</sup> Ukhalhawaya uwanneyaka mii ukhalha nkumi phi unkaviha ntheke Kuristo ni ukhwa phi ifaida.

<sup>22</sup> Nansho yakhalhaka wiira ukhalha nkumi phi ifaida yuulhupalhe yo munthekoni, paahi etu, akichuwenlhe inohalha aka uthanlha. <sup>23</sup> Alha melhi alha etu ahokivara. Kinoothanana chinene uthama kihiye ulha ukumi ulha

kakhalhe ni Kuristo, ukhalhawaya phi ittu irii yoombone chinene,<sup>24</sup> nansho ukhalha nkumi wo nlhatu winyu mwaatti phi ittu yo lazima chinene.<sup>25</sup> Ni mii kihochuwelha wiira kinoothepa ulhokelha vamoka ni inyu mwaatti onkhaye kuukaviheni mmwe mwaathepa uvarechesha ni uteelhiya nrима,<sup>26</sup> wiira vanohalha aka ukhalha ni inyu mwaatti vаво, mmwe mwaateelhiya chinene wo ulhutaana winyu ni Kuristo Yesu.

<sup>27</sup> Paahi etu, meetelho inyu akhalheke thoko chinothananiya ni Malhove Orera a Kuristo, wiira kooriaka uwa ama kaahorieke, kiwe keewa wiira nheemelha rata wo nrима mmoka ni wo nnikwa mmoka wo wiinanelha nrима unowi-иhiya wo Malhove Orera.<sup>28</sup> Nhoove attu anoovin-gani nansho mweemelheke rata. Yeyo phi ittu inooniha upotera waya, ni inyu mwaatti nnowa mwoopolhiya ukhalhawaya Nlhuku phi nouva-herani noopo.<sup>29</sup> Ukhahawaya kila ntu Nlhuku hommaha imboote yo unkaviha Kuristo, kuhewe wo unrumelhelha vekha ayaru nansho ni ut-warushiya wo nlhatu wawe.<sup>30</sup> Vano nnowooria ukavihana ni mii ikhoto yo wiinanelha Malhove Orera mwonne inyu kaatakanaka katashi valhe. Ni iyo phi iyo inothepe aka waatakanaka mpaka nna thoko chineera inyu wo wiiwa.

## 2

### *Utwariha wiitimarikha wa Kuristo*

<sup>1</sup> Chani ukhalha winyu nlhoko mmoka ni Kuristo unouvahani machiri? Chani uttuna wawe unouvahani mpuha uriwoothe? Chani nnoohlutaana ni Iphumu ya Nlhuku? Chani

nhanaa nrima wo woonelhana ikiriri ni uchukulhelhana mwaashineneru? <sup>2</sup> Paahi etu nthep-  
eke ukiteelhiha nrima wo ukhalha ni moop-  
uwelho mamoka ni nrima mmoka wo uttunana  
ni nrima mmoka wo ulhakelha ittu imoka.  
<sup>3</sup> Nhipange ittu iriyoothe wo nrima wo niwuch-  
ama wo wiitithacha nansho mwiitimarikheke  
mwaashineneru, kila mmoka amwooneke nkhu-  
nanawe wiira phi ittu yoombone umpwaha  
mwanene. <sup>4</sup> Kila ntu hilhohe mathananelho awe  
mwaneneru nansho alhoheke mathananelho a  
attu akina. <sup>5</sup> Nkhalheke ni irusho thoko yolhe  
waarina awe Kuristo Yesu.

<sup>6</sup> Yoyo thoko chiri awe wo machokholhelho aari  
Nlhuku,  
nansho khaanyihenre wiira wo ukhalha thoko  
Nlhuku  
phi ittu yo ukuruvalhelha,  
<sup>7</sup> nansho wo uttuna wawe mwanene  
ahohiya kila ittu yaarina awe,  
nkeepanga ukhalha thoko namitheko.  
Nkoonia ikhove awe thoko chinokhalha aya attu  
akina.

<sup>8</sup> Tho aheetimarikha mpaka ukhwa  
ukhwa vansalaabani.

<sup>9</sup> Paahi etu Nlhuku ahomwiinulha uchulhu  
chinene  
nkammaha Nchina nulhupalhe  
nimpwaha machina onkhaye.

<sup>10</sup> Wiira wo nchina na Yesu  
chittu chonkhaye cho wiirimu ni cho velhaponi  
ni cho unaminepa  
chiwe chaakhoroma wo nthimicho,  
<sup>11</sup> ni kila nlhimi nirumelhelheke wiira  
Yesu Kuristo phi Athithi,

wo nthimicho wa Nlhuku Athumwanihu.

*Umwahlia thoko nthuko wo velhaponi*

<sup>12</sup> Paahi etu ashilhoko aka, thoko chenre inyu wo ukiwelhelha ikatema chonkhaye, kuhii vaari aka tu, nansho ata vano vahiri aka ya, nthepeke unvarelhelha noopo inyu mwoovaka ni uthukumelha, <sup>13</sup> ukhalhawaya Nlhuku phi nopanga ntheko nhina mwinyu ikatema choothe, mwoorie uttuna ni upanga chinothanana inyu wo utimiraha mathanelho awe oombone.

<sup>14</sup> Paahi etu, mpangacheke kila ittu wo uhitukutuwacha mena uvaanyihana, <sup>15</sup> wiira nkhalheke attu ahinokhuwachiya mena ahinooothacha. Nkhalheke ashaana omanya a Nlhuku anokhalha ilhapo yo uhilhoka ya attu apotenre, o uwonya. Mwoonieke munlhokoni mwaya thoko ittotwa chinomwalhia wiirimu, <sup>16</sup> uno nvarecheshaka rata ntenga unowiiha ukumi. Vavawo kinoowa kaapatta nlhatu wo wiishipa nihuku no uwa tho Kuristo nno, ukhalhawaya inowa yoonia wiira akivanre ntheko wo maphathi mena akihunve wo maphathi.

<sup>17</sup> Ata ukumi aka wakumihiyaka vamoka ni ntheko inyu wo nrime urii isadaka wa Nlhuku, kinootelhiya munrimani chinene ni ukawelhani mwaattiva onkhaye uteelhiya waka uwo. <sup>18</sup> Ni inyu mwaatti chiicho nteelhiyeke, tho nteelhiyeke vamoka ni mii.

*Natimotheo ni Naepafroditu*

<sup>19</sup> Kinokhulhuelha wa Athithi Yesu waaruma Natimotheo awe uwaninyu uwo chitema, ikhalhe iphiro yo ukihelha nrime vanohalha

aka wiiwa mwaha inyu vawo. <sup>20</sup> Ukhahawaya akirina ntu nkina o nrima thoko yoyo nochenjeukelhani wo ikekhiaye. <sup>21</sup> Kwaani attu akina ayo anochenjeukelhacha mwaha aya ashineneru, wo uhinchchenjeukelha Yesu Kuristo. <sup>22</sup> Ni inyu mwaattiva nhaachuwelha Natimotheo chinre aya wo weemelha rata uhimiacha Malhove Orera. Yayo ni mii ninovara ntheke vamoka thoko mwaana na athumwanawe. <sup>23</sup> Wo chiichammo etu, kinokhulhuvelha waaruma awe uwaninyu chitema, vanottuna aka uchuwelha mwaha unohalha ukikhumelhelha. <sup>24</sup> Ni mii kinorumelhelha wiira Athithi anookooriha uwa uwaninyu chitemaru.

<sup>25</sup> Kihonna wiira ihokhalha lazima unruma uwaninyu munnihi Epafrodit, namitheko nanaka munthekoni ni wiinanelhani Malhove Orera, rii karumiya inyu nokikaviha wo chittu chinothanana aka. <sup>26</sup> Ukhahawaya holhakelha chinene uwoonani mwaatti onkhaye, achukulhaka chinene ukhalhawaya thoko mwaheewa wiira aari nreta. <sup>27</sup> Eiyo, aari nreta aatameriaka uriha ukumi awe, nansho Nhuku ahomwoonelha ikiriri. Khoonelhiye ikiriri yo vekha aweru, ila ni mii chiicho wiira kihithepe ukelhiya ihuzuni chinene. <sup>28</sup> Paahi etu, kihomananiha chinene unruma awe uwaninyu, wiira vanottuna inyu umwoona vawo nteelhiyeke mirima ni mii nikithame nipampa nna. <sup>29</sup> Paahi etu mumpochereke wo nchina na Athithi ni uteelhiya, mmwaalhakelheke thoko ntu munlhokoni mwa attu o ulhohiya rata. <sup>30</sup> Ukhahawaya yoyo ahaatameria ukhwa wo nlhatu wo ntheke wa Kuristo wo uhelha

ukumi awe ntatakoni wiira atimirihе ntheko wo ukikavihera mii chittu chahoonrie inyu ukipangelha mwaashinene.

## 3

### *Umanya we ikekhanе mmiholho wa Nlhuku*

<sup>1</sup> Wo umalhihera, ashilhoko aka, nteelhiyeke vanolhutaana inyu ni Athithi. Akinoochaa uhokolheelha ulhepa malhove amanlhe aka ulhepa vatulhi, ukhalhawaya yayo anouthepihani ukhalha rata.

<sup>2</sup> Mwiichinanelheke ni attu ari thoko ashipwa ayo, attu anopanga chittu cho uhilhoka, attu anomindelha mwaha wo wiinelhiya unyawo.

<sup>3</sup> Hii phi attu niinelhiye unyawo we ikekhiaye kahii ayo, ukhalhawaya ninonthimicha Nlhuku wo iphiro yo Iphumu awe ni wiishipa wo ulhutaana ni Kuristo Yesu, nihihelhelhaka mwaha wo wiinelhiya unyawo mwiiruttuni. <sup>4</sup> Miyaano chiicho kaanooria ukhulhuvelha iruttu aka,

Akhalkaka haawo ntu nkina nokhulhuvelha iruttu awe, mii phi thepilhe. <sup>5</sup> Mii keenelhiye unyawo nihuku no nane toka uyaria waka. Ki Mwiisraeli mii o nikosho ni ashinna Benyamini, Muebraniya nnenene. Vanaachiya mwaha wo uvarechesha Malhehero a ashinna Musa, mii kaari Mfarisayo, <sup>6</sup> kaakuruvalhelha chinene mpaka nkakaatwarusha milhoko cha attu anonrumelhelha Kuristo. Vanaachiya mwaha wo umanya unopattiya wo uvarechesha Malhehero, kaari o uvarechesha ikekchia wo uhikhuwachiya.

<sup>7</sup> Nansho wo nlhatu wo unchuwelha Kuristo yayo onkhaye koona aka wiira phi ifaida

ayo, phi noona aka vano uhikhalha ittu.  
<sup>8</sup> Eiyo, wo uthepa vavawo, kinaalhakelha kila ittu uhikhalha ittu wo nlhatu wo urea chinene wo unchuwelha Kuristo Yesu, Athithi. Wo nlhatu waya kihoriha kila ittu koona aka thoko mavi wiira kimpatte Kuristo,  
<sup>9</sup> ni ulhutaanihiya ni uyo vamoka. Akinottuna tho wiichalhakelha ikekhiaye inopattiya wo uvarechesha Malhehero a ashinna Musa, nansho ikekhiaye impattiya wo unrumelhelha Kuristo. Ikekhiaye inokhuma wa Nlhuku wo nrima wo unrumelhelha. <sup>10</sup> Kinothanana kinchuwelhe Kuristo ni woona machiri o uhimmwa wawe, kinkhalhane nlhoko mmoka kinkavihe utwarushiya wawe, kilhikaanihiyaka ni nookhwa awe, <sup>11</sup> kikhulhuvelhaka wiira ni mii chiicho kinohihimushiya unookhwani.

### *Uttimakelha Nttuvo*

<sup>12</sup> Mena akineera wiira kihophiyelha ama kihorata. Nansho kirii kimananihaka wiira kipatte nttuvo nno. Ukhahawayo wo nenko nttuvo nno Kuristo Yesu ahokipatta mii. <sup>13</sup> Ashilhoko aka, akinaanyihera wiira kihopatta nenko nttuvo nno nansho kinopanga ittu imoka, ulhiyalha mwaha uvinre ni umananiha upatta alhe arii mmiholho alhe. <sup>14</sup> Paahi etu, kinottimakacha wiira kipochere nttuvo no wiirimu uchulhu no ukumi wo uhimalha nno niihanenlhe awe Nlhuku wo iphiro yo Kuristo Yesu.

<sup>15</sup> Paahi etu, hii nikromanlhe muulhutaanani ni Kuristo va, irusho chihu chuupuwelheke yayo. Nansho ata moopuwelhaka makina, Nlhuku noupatakulhelhani yoyo mwaha uyo. <sup>16</sup> Nansho

vavawo vaphiilhe ihu vawo, nkanngwe etu nitwareke ikekhiaye itwarilhe ihu toka machokholhelho mpaka nna iyo.

<sup>17</sup> Ashilhoko aka nkithakiheke mii ni waatwariha rata attu anokhalha wo uttware iphiro choombone chiuvanheni ihu chiyo.

<sup>18</sup> Ukhalhawaya kahohimeriani ulha mwaha ulha venchi, vano kinohokolhelha uhimeriani tho kimorihaka miithori wiira ahaawo attu enchi ahonvinga nookhwa a Kuristo vansalaabani.

<sup>19</sup> Yayo manyaattu ayo anokelha ulhakalha umooroni, ukhalhawaya itama chaya cho mwiiruttuni phi nlhuku aya, anothimicha chittu chinoolhiha muru ni wuupuwelha chittu cho velhaponiru. <sup>20</sup> Nansho hii anenchi o wirimu, ni ukhuma wowo ninommweherera wo nrimal Moopolhi ihu Athithi Yesu Kuristo awe.

<sup>21</sup> Yayo anowa urukunusha iruttu chihu cho wunta chi chiwe chaalhikaana ni iruttu aya yo nthimicho wo wooria waya unooria weesha chittu chonkhaye mwiikuruni mwaya.

## 4

### *Malhove o uhelhana nrima*

<sup>1</sup> Paahi etu ashilhoko aka kinaattuna aka, kinaahuvelha aka chinene woona, mwaatti nnoki-teelhiha nrimal nri mphumburu aka, mweemelheke rata muulhutaanani ni Athithi, ashilhoko aka kinaattuna aka.

<sup>2</sup> Ni inyu mwaatti, Naevodia ni Nasuntike kinoupepechani ni ulhepelhani wiira mwaattuneke thoko attu alhutanne wo nrimal mmoka, mwi iphiro ya Athithi. <sup>3</sup> Ni inyu onnaka o

ikekhiaye va, kinouthananani wiira mwaakavi-heke yayo manyopani ayo ukhalhawaya ahovara ntheko wo uhimiacha Malhove Orera vamoka ni mii ni ashinna Kelementi ni anamitheko akhunanaka akina onkhaye machina aya alhepiye nhina ikitabu yo ukumi.

<sup>4</sup> Paahi etu mwaatti, nteelhiyeke mirima wo ulhutaana ni Athithi, ikatema yonkhaye. Kineera tho, nteelhiyeke mirima. <sup>5</sup> Umaalha winyu uchuwanieke wa attu onkhaye. Athithi ari vakhiviru uwa. <sup>6</sup> Nhikelhiye nipampa no ittu iriyoothe nansho wo kila ittu, munlhapel-heke Nlhuku chittu chinothanana inyu ni unshukuru. <sup>7</sup> Ni mpuha wa Nlhuku umpwaha irusho chonkhaye cha attu, unoshungerera rata mirima chinyu ni irusho chinyu wo ulhutaana ni Kuristo Yesu.

<sup>8</sup> Ashilhoko aka wo umalhihera kineera, nvarechesheke chittu choombone chinothananiya utotopelhiya, nvarechesheke ikekheni ni mwaha we ikekhiaye, nvarechesheke mwaha uhinanarihiya ni mwaha unorumihia ipilhi. <sup>9</sup> Mpangacheke chittu chiittunche inyu ni upochera ukhuma uwannyaka mii, chiiwilhe inyu ni woona kipangachaka. Nlhuku naavaha attu mpuha nookhalha vamoka ni inyu.

### *Napaolo anoshukuru izawadi cha attu o Ufilipi*

<sup>10</sup> Kihoteelhiya nrima chinene wo ulhutaana ni Athithi ukhalhawaya irusho chinyu chihoku-upuwelha, tho kichuwelhaka we ikekhiaye wiira mwankupuwelha nansho mwaari nhinapatta nipesha. <sup>11</sup> Akineera chiicho wo nl-

hatu no uthanana ittu, ukhalhawaya kiheet-tucha upisha nrima wo kila iphiro inokhalha aka. <sup>12</sup> Kihochuwelha ukhalha ni chittu chinchi ni uhikhalha ni ittu. Kiholhemalhelha upisha nrima vanorupalha aka ama vanowolhiya aka ithalha, vanokhalha aka ni ittu ama vanowukuwelhiya aka. <sup>13</sup> Kinowooria chittu choothe wo iphiro ya Kuristo nokihelha machiri. <sup>14</sup> Nansho mwaattiva mwahopanga ittu yombone vaari inyu nlhoko mmoka wo uhuva ni mii.

<sup>15</sup> Mwaatti attu o Ufilipi va, nhochuwelha rata wiira mahuku aapachera aka uhimiacha Malhove Orera vaakhuma aka Umakedoniya, mwaatti yeekha inyu phi nlhoko wa attu anrumelhenlhe Kuristo yaakikavinhe. Phi inyu mwaavaranne ni mii upochera ni ukumiha waavaha akina chittu chinohuvelha aya. <sup>16</sup> Ukhahawaya ata vaari aka Uthesalonike mwaatti mwahokiwihera venchi chittu chaahuvelha aka. <sup>17</sup> Kuhii wiira kinothanana upochera izawadiru, mena, kinothanana woona mahalha inyu o upanga moombone anowuncherereria. <sup>18</sup> Paahi etu, kihopochera chittu chonkhaye chikivanhe inyu chipwahaka ata mahuvelho aka. Vano etu kihanaa *kila* ittu yaavanhe inyu Naepafroditu wiira akiwihera. Chittu chikhanlhe thoko isadaka yo nimiriri no unukhelha inorumelhelhiya ni unteelhiha Nlhuku. <sup>19</sup> Paahi etu, Nlhuku wo nhakhu wawe mwinchi nouvahani kinothanana inyu chonkhaye wo nthimicho wawe mulhupalhe wo iphiro ya Kuristo Yesu. <sup>20</sup> Avahiye nthimicho Nlhuku Athumwanihu, wo mahuku o uhimalha

ni uhimalha. Aye.

*Isalamu cho umalhihera*

<sup>21</sup> Mwaavaheke isalamu chaka attu onkhaye a Nlhuku arii awawe Kuristo Yesu. Ashilhoko ihu anaakhalhana aka vaa ni ayo anouvahani isalamu. <sup>22</sup> Attu onkhaye a Nlhuku, anokhalha vaa ayo, athepaka alhe o unupani wa Nakaisari ni ayo anouvahani isalamu.

<sup>23</sup> Nnema wa Athithi Yesu Kuristo ukhalhe vamoka ni nrima inyu onkhaye.

**Makua New Testament 2015  
Makhuwa-Meetto: Makua New Testament 2015 New  
Testament**

copyright © 2016 The Word for the World International

Language: Makhuwa-Meetto

Contributor: The Word For The World

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-11-11

---

PDF generated using Haiola and XeLaTeX on 11 Nov 2022 from source files dated 29 Jan 2022

87ae4d2f-90f6-5bdd-b41e-00464a1ad514